



Komunikadu Imprensa
Munisípiu Munisípiu Ermera
08 Agostu 2017

Suku Coliate Leotelu – Hatualia hosi Munisípiu Ermera primeira-ves asesu ba informasaun kona-ba Parlamentu Nasionál no asesu ba justisa formál

Iha 03 Agostu 2017, ekipa *Judicial System Monitoring Programme (JSMP)* kontinua habelar informasaun liuhosi formasaun ba xefe suku no membru suku, inklui membru comunidade balun iha Suku Coliate Leotelu, Postu Administrativu Hatulia, Munisípiu Ermera.

Totál partisipante ne'ebé partisipa iha formasaun ne'e hamutuk ema na'in 32 ne'ebé kompostu hosi mane na'in 24 no fetu na'in 8. Maioria hosi partisipante ne'e mai hosi membru Konsellu Suku ne'ebé kompostu hosi xefe suku, xefe aldeia, lia-na'in, no delegadu sira hosi aldeia. Totál aldeia hosi suku ne'e hamutuk 7 no membru Konsellu Suku hamutuk ema na'in 22.

Objetivu husi treinamentu ne'e maka atu habelar informasaun no hasa'e koñesimentu partisipante sira-nian kona-ba demokrasia, knaar órgaun soberanu sira-nian, partisipasaun públiku iha proseu halo lei no asesu ba justisa formál.

“Formasaun ne'ebé JSMP fornese ba autóridade no membru sira Konsellu Suku nian ne'e ho intensaun atu hasa'e sira-nia koñesimentu ba asuntu importante no relevante sira, nune'e bele tulun sira atu bele hala'o sira-nia knaar ho di'ak, efetivu no efisiente, liu-liu kona-ba oinsa sira bele trata asuntu ka problema sira ne'ebé mosu iha sira-nia comunidade laran.” dehan Diretór Ezekutivu JSMP, Luis de Oliveria Sampaio.

Partisipantes sira afirma katak hahú hosi restaurasaun independénsia iha 2002 to'o ohin loron, foin primeira-ves mak estrutura suku no membru comunidade sira hetan formasaun kona-ba informasaun sira ne'ebé JSMP fahe ho sira, tanba suku ne'e aleinde distánsia do'ok, kondisaun estrada mós la di'ak, liu-liu iha tempu udan. Tanba ne'e sira realsa katak materia ne'ebé JSMP fahe ne'e sai hanesan “bekal/bukae” ida ba xefe suku no Konsellu Suku atu bele hala'o nia knaar tuir lei haruka

Antes formasaun, JSMP koko koñesimentu partisipante sira-nian kona-ba matéria liuhosi kestionáriu pré-teste no nia rezultadu hatudu katak antes formasaun koñesimentu partisipante sira-nian kona-ba knaar órgaun soberanu sira-nian tun loos. Iha partisipante na'in 4 de'it ka porsentu 13% mak hatan loos hotu no partisipante sira-nia koñesimentu kona-ba knaar instituisaun no autór judisiáriu sira-nian mós tun loos, iha partisipante na'in 3 ka porsentu 10% de'it mak hatan loos.

Partisipante sira iha duni interese hodi partisipa ho di'ak iha formasaun ne'e. Materia hosi formasaun ne'e iha sesaun rua. Sesaun dahuluk ko'alia kona-ba demokrásia, knaar órgaun soberania sira-nian no partisipasaun públiku iha prosesu halo lei.

Sesaun daruak, kona-ba asesu ba justisa formál. Kestaun sira ne'ebé partisipante sira foti iha sesaun dahuluk nian mak kona-ba asuntu pesaun vitalisia, lei suku nian, liu-liu subsidiu ba delegadu sira no falta sosializasaun ba lei sira ne'ebé vigora ona iha Timor-Leste. Kestaun sira ne'ebé partisipante sira foti iha sesaun daruak nian mak kona-ba justisa ne'e aplika ba ema boot sira de'it, ema ki'ik sira la iha, kazu violasaun no abuzu seksuál, kazu atuasaun polisia ne'ebé bainhira joven sira baku malu, polisia ba kaer joven sira, maibé baku fali xefe aldeia.

Hatan ba kestaun sira sesaun dahuluk nian, JSMP informa ba partisipantes sira katak Parlamentu Nasionál hadi'a ona lei sira ne'ebé regula pensaun vitalisia hodi hatun nia porsentajen sira. Lei suku nian, JSMP informa ba sira katak tuir loloos iha momentu governu mai halo konsultasaun públika ba líder lokál sira, líder lokál sira tenke partisipa ho di'ak atu hato'o sira nia hanoin iha momentu lei ne'e sei iha prosesu hela. Bainhira lei ne'e tama ona ba vigór, ne'e obrigatóriu atu halo tuir. Atu hadi'a fali, presiza halo advokasia maka'as ba parte relevante sira, liu-liu Parlamentu Nasionál.

Enkuantu sosializasaun ba lei sira, JSMP informa ba sira katak tuir loloos Governu no Parlamentu nia obligasaun atu sosializa lei sira ne'e tanba ne'e konstitui direitu sidadaun nian hodi asesu ba informasaun ne'ebé konsagra iha Konstituisaun. Maibé JSMP hanesan parseiru Governu nian, kontribui mós hodi habelar informasaun sira ne'e ho apoiu governu nian.

Hatan ba kestaun sira iha sesaun daruak nian, JSMP informa ba sira katak justisa ne'e hanesan ba ema hotu, la iha diskriminasaun. Agora iha ema boot barak ne'ebé balun ba ona prizaun no balun sei prosesa hela iha tribunál. Prosesu ba kazu mak kle'ur tanba iha kazu barak loos mak rejista iha tribunál. Enkuantu kazu violasaun no abuzu seksuál, JSMP esplika katak iha diferensa entre violasaun seksuál no abuzu seksuál. Violasaun seksuál akontese bainhira parte arguidu no vítima tinan boot hotu no arguidu obriga vítima hodi halo relasaun seksuál no abuzu seksuál akontese bainhira arguidu tinan boot no vítima tinan ki'ik ka menór.

Kazu abuzu seksuál maske vítima hakarak mós nafatin konsidera hanesan krime. Kazu atuasaun polisia ho violénsia no la tuir lei no regra ne'e nia komete violasaun direitu umanu tanba nia reprezenta instituisaun públiku Estadu nian no iha autóridade no nia mós komete krime bainhira halo ofensa ba integridade fízika ema seluk nian. Kazu hanesan ne'e bele denúnsia ba Ministériu Públika no PDHJ. kualkér ema ne'ebé haree bele halo denúnsia bainhira polisia ne'e komete krime públiku.

Depoizde treinamentu JSMP koko sukat koñesimentu partisipante sira-nian liuhosi kestináriu pós-teste no nia rezultadu hatudu katak 60% hatene ona ka hatan loos hotu saida mak knaar órgaun soberanu sira nian no 57% hatene ka hatan loos hotu saida mak knaar instituisaun no autór judisiáriu sira-nian.

Bainhira formasaun ne'e to'o ba nia rohan, Xefe Suku Coliate-Leotelu, Abel Maia da Costa antes ensera hateten ba membru sira Konsellu Suku no membru komunidadade sira ne'ebé partisipa iha formasaun ne'e katak informasaun ne'ebé formadór sira JSMP nian fahe ne'e nu'duar "*bekal* ka bukae" ida membru Konsellu Suku sira bele aplika bainhira hala'o sira-nia knaar iha sira-nia komunidadade.

Informasaun sira ne'e la'ós atu rona de'it, maibé importante mak tenke aplika no fahe tutan tan ba membru komunidadade sira ne'ebé la partisipa iha formasaun ne'e. Xefe Suku ne'e rekomenda atu JSMP nafatin bele inklui sira-nia suku bainhira iha tan informasaun importante seluk atu fahe.

Atividade ne'e realiza tanba hetan apoiu finanseiru husi Fundus Sosiadade Sivíl, Gabinete Primeiru Ministru

Atu hetan informasaun kle'an favór kontaktu:

Luis de Oliveira Sampaio
Diretór Ezekutivu JSMP
Email: luis@jsmp.tl